

22 JAN 2002

Sukan-Ironman/I

PERKENAL NILAI SUKAN TRIATHLON DIKALANGAN RAKYAT M'SIA, KATA DR MAHATHIR

LANGKAWI, 22 Jan (Bernama) -- Perdana Menteri Datuk Seri Dr Mahathir Mohamad berkata semua pihak yang terbabit dalam Kejohanan Triathlon Ironman Langkawi 2002 perlu meneruskan usaha mempromosikan sukan triathlon dikalangan rakyat Malaysia.

"Saya berharap sebagai penganjur acara ini, kerajaan negeri Kedah dan Langkawi Ironman Endurance Marathon (LIEM) Sdn Bhd, harus mempromosikan nilai-nilai seperti kekuatan mental, kecergasan fizikal dan disiplin serta cara hidup sihat", kata beliau dalam kata pendahuluan dalam program cenderahati Kejohanan Triathlon Ironman Langkawi.

Dr Mahathir berkata acara ini yang mempunyai ramai peminat di seluruh dunia akan membantu menonjolkan Langkawi sebagai destinasi pelancongan selain memperkenalkan pulau perangan ini sebagai satu daripada gelanggang sukan triathlon yang penting di dunia.

"Saya ingin mengucapkan tahniah kepada kerajaan negeri Kedah dan LIEM Sdn Bhd atas usaha bersama menganjurkan Triathlon Ironman Malaysia 2002 di Langkawi", kata beliau.

Dr Mahathir berharap semoga acara itu mencapai kejayaan dan mengucapkan selamat berjaya kepada semua peserta.

"Bagi peserta asing, saya sekali lagi mengucapkan selamat datang dan berharap mereka akan meluahkan masa untuk menikmati keindahan pulau ini dan kepada peserta tempatan, saya berharap semoga mereka beroleh kejayaan dan Malaysia Boleh," kata beliau.

Sementara itu, beberapa peserta handalan ialah antara mereka yang tiba di sini hari ini bagi menyertai kejohanan itu yang akan berlangsung pada 27 Jan.

Peserta handalan itu antaranya ialah peserta profesional dari Amerika Syarikat, Randy Cadell, peserta cacat, yang menyertai buat kali kedua tahun ini.

Cadell memulakan latihan hari ini dengan menggunakan basikal yang diubahsuai khas untuk membiasakan diri dengan keadaan cuaca di sini.

Menurut penganjur, juara bertahan Bryan Rhodes yang berasal dari New Zealand, dan peserta Jerman, Lothar Leder yang menduduki tempat kedua pada kejohanan tahun lepas dijangka tiba pada Khamis.

Peserta dari Afrika Selatan, Tisnik Raynard yang menduduki tangga ketiga dan rakan senegarannya Glen Gore, yang menduduki tangga kelima, pada kejohanan tahun lepas, dijadual tiba pada Jumaat.

-- BERNAMA

NH FAZ